

Grad Novi Pazar
Skupština grada
Odbornička grupa SDA Sandžaka
Novi Pazar
09. februar 2022. godine

P R E D S J E D N I K U
SKUPŠTINE GRADA NOVOG PAZARA

Na osnovu člana 44. stav 1. i člana 149. Statuta grada Novog Pazara („Službeni list grada Novog Pazara“, broj 6/19), člana 44. stav 1. i člana 138. stav 1. Poslovnika Skupštine grada Novog Pazara („Službeni list grada Novog Pazara“, broj 6/19) podnosimo **PRIJEDLOG ODLUKE O POKRETANJU INICIJATIVE ZA PRIZNAVANJE GENOCIDA NAD BOŠNJAČKIM NARODOM U SREBRENICI**, sa prijedlogom da se, shodno članu 109. Poslovnika Skupštine grada Novog Pazara, uvrsti u dnevni red i donese na sjednici Skupštine grada koja će se održati 10. februar 2022. godine.

Predsjednik odborničke grupe
Ahmedin Škrijelj

PRIJEDLOG

Na osnovu člana 79. stav 1. tačka 2. Zakona o lokalnoj samoupravi („Službeni glasnik RS“, broj 129/2007, 83/2014 – dr. zakon, 101/2016 – dr. zakon i 47/2018), člana 4. stav 1. Zakona o zaštiti prava i sloboda nacionalnih manjina ("Službeni list SRJ", br. 11/2002, "Sl. list SCG", br. 1/2003 - Ustavna povelja i "Službeni glasnik RS", br. 72/2009 - dr. zakon, 97/2013 - odluka US i 47/2018), člana 147. Statuta grada Novog Pazara („Službeni list grada Novog Pazara“, broj 6/19) i člana 137. Poslovnika Skupštine grada Novog Pazara („Službeni list grada Novog Pazara“, broj 6/19), Skupština grada Novog Pazara na sjednici održanoj 10. februara 2022. godine, donosi

O D L U K U

o pokretanju inicijative za priznavanje genocida nad bošnjačkim narodom u Srebrenici

Član 1.

Skupština grada Novog Pazara traži od Narodne skupštine Republike Srbije, Vlade Republike Srbije i drugih državnih organa Republike Srbije da donošenjem odgovarajućih akata osiguraju:

- priznavanje da je nad bošnjačkim narodom u Srebrenici počinjen genocid, kako je to utvrđeno pravosnažnim presudama relevantnih međunarodnih sudova;
- da se negiranje genocida nad bošnjačkim narodom u Srebrenici utvrdi kao krivično djelo za koje se može izreći kazna zatvora u trajanju od najmanje 5 godina;
- da se veličanje i javno promovisanje osuđenih ratnih zločina utvrdi kao krivično djelo za koje se može izreći kazna zatvora u trajanju od najmanje 3 godine;
- da se u Republici Srbiji 11. july proglašuje za Dan sjećanja na genocid u Srebrenici.

Član 2.

Odluku dostaviti Narodnoj skupštini Republike Srbije i Vladi Republike Srbije.

Član 3.

Ovu odluku objaviti u „Službenom listu grada Novog Pazara“.

SKUPŠTINA GRADA NOVOG PAZARA

Broj:

U Novom Pazaru, _____. _____. 2022. godine

PREDSJEDNIK

Dr. Anela Šemsović

O B R A Z L O Ž E N J E:

Pravni osnov za donošenje odluke:

Članom 79. stav 1. tačka 2. Zakona o lokalnoj samoupravi propisano je, da organi i službe jedinice lokalne samouprave u vršenju svojih nadležnosti podnose predstavke i daju prijedloge u pogledu postupanja organa Republike.

Članom 4. stav 1. Zakona o zaštiti prava i sloboda nacionalnih manjina propisano je da Organi vlasti u Republici Srbiji u skladu sa Ustavom i zakonom donose propise, pojedinačne pravne akte i preduzimaju mjere u cilju obezbjeđenja pune i efektivne ravnopravnosti između pripadnika nacionalnih manjina i građana koji pripadaju većini.

Statutom Grada Novog Pazara propisano je da Skupština grada Novog Pazara u vršenju svojih poslova, između ostalog, donosi i odluke (član 147.)

Članom 137. Poslovnika Skupštine grada Novog Pazara propisano je da Skupština donosi: odluku, program, plan, rešenje, zaključak, Poslovnik, deklaraciju, rezoluciju, preporuku, druge akte u skladu sa zakonom, Statutom i Poslovnikom.

Razlozi za donošenje odluke:

Na osnovu pravosnažnih presuda Haškog tribunal I Međunarodnog suda pravde, utvrđeno je da je u Srebrenici jula 1995. godine izvršen zločin genocida gdje je ubijeno 8.372 bošnjačkih civila.

Evropski parlament, Sjedinjene Američke Države, Velika Britanija, Belgija, Litvanija, Luksemburg, Švicarska, Hrvatska, Makedonija, Kanada, Australija, Iran, Republika Crna Gora, Republika Kosovo kao i mnogo druge države u svijetu donijeli su Rezolucije o osudi genocida u Srebrenici.

Presudom Međunarodnog suda pravde iz 2007. godine, Republika Srbija je proglašena krivom zbog toga što nije spriječila genocid i zbog toga što nije kaznila počinioce.

Prihvatanjem ove Inicijative Republika Srbija, pokazuje posvećenost evropskim i evroatlantskim vrijednostima i jasno se svrstava na stranu civiliziranih država koje promovišu demokratske vrijednosti, ljudska prava, temeljne slobode, i suživot, kao najveće vrijednosti društva te skida kolektivnu odgovornost sa cjelokupnog srpskog naroda za genocid počinjen nad bošnjačkim narodom u Srebrenici.

Priznavanje genocida u Srebrenici je civilizacijski korak koji je potreban Srbiji kako bi potvrdila ozbiljnost u namjeri za izgradnju dijaloga, saradnje, povjerenja i trajnog mira u regionu zasnovanom na prihvatanju odgovornosti iz prošlosti, suočavanju sa prošlošću i povećanju univerzalnim ljudskim vrijednostima, podršci žrtvama kao osnovi za jačanje bezbjednosti, stabilnosti i prosperiteta u regionu.

Proglašenje 11. jula kao Dana sjećanja na genocid u Srebrenici predstavlja i jasno opredjeljenje Republike Srbije za suštinsku transformaciju u društvo koje je dio moderne civilizacije, koje u budućnosti neće ugrožavati narode i države u okruženju, iskazuje najveći pijetet prema žrtvama genocida. Proglašenje 11. jula za Dan sjećanja predstavlja poruku i satisfakciju Bošnjacima Sandžaka da se prema njima više nikada neće preduzimati nasilne državne aktivnosti, da će se otkloniti svi oblici diskriminacije te da će moći da slobodno uživaju sva svoja prava.

Prihvatanjem obaveza propisanih ovom Inicijativom predstavlja osnovni uslov za rješavanje svih otvorenih pitanja između srpskog i bošnjačkog naroda.

Velikosrpske nacionalističke strukture sve agresivnije i učestalije negiraju genocid, isti glorifikuju te veličaju ratne zločince odgovorne za genocid i druge zločine počinjene nad Bošnjacima Srebrenice i drugih dijelova BiH, Bošnjacima Sandžaka ali i zločine počinjene nad svim nersrpskim narodima na prostoru bivše SFRJ.

Takva atmosfera u društvu predstavlja otvorenu prijetnju i sa pravom kod Bošnjaka u Sandžaku izaziva osjećaj straha i nesigurnosti, koji su tokom vremenskog perioda kada je izvršen genocid u Srebrenici bili izloženi organizovanom državnim terorom.

Veličanje genocida počinjenog nad bošnjačkim narodom u Srebrenici i veličanje osuđenog ratnog zločinca Ratka Mladića, kao i otvorene prijetnje koje se upućuju bošnjačkom narodu postale su pravilo i sastavni dio svake sportske utakmice na kojoj učestvuju sportisti iz Novog Pazara i Sandžaka.

Sportska takmičenja postala su poligon za promociju mržnje i neprijateljstva prema Bošnjacima, za šta odgovornost snosi srpski državni vrh i srpske službe bezbjednosti.

Tolerantan odnos državnih organa prema tim negativnim pojavama za posledicu će imati narušavanje međunacionalnih odnosa, povećan stepen nepovjerenja u državne organe i institucionalizaciju neprijateljstva prema bošnjačkom narodu.

Kreiranjem atmosfere u kojoj je mržnja i neprijateljstvo prema Bošnjacima društveno prihvatljiva kategorija, velikosrpski državni vrh ima za cilj da završi sve ono što je režim Slobodana Miloševića započeo a nije uspio da završi.

S tim u vezi neophodno je da se negiranje genocida utvrdi kao krivično djelo za koje se može izreći kazna zatvora do najmanje 5 godina, kao i da se veličanje i javno promovisanje osuđenih ratnih zločinaca utvrdi kao krivično djelo za koje se može izreći zatvorska kazna u trajanju od najmanje 3 godine.

Posljednji događaji u Priboju gdje su aktivni pripadnici policije veličali genocid u Srebrenici te upućivali otvorene prijetnje Bošnjacima Sandžaka da će od Novog Pazara napraviti Vukovar a od Sjenice novu Srebrenicu jasno ukazuje da je neophodno da Skupština grada pokrene ovu Inicijativu a da državni organi istu private i postupe na način propisan ovom Inicijativom.

Grad Novi Pazar, kao glavni grad Sandžaka, kao lokalna samouprava u kojoj živi najveći broj Bošnjaka u Sandžaku i Republici Srbiji ima obavezu da zarad opšte sigurnosti svojih građana bošnjačke nacionalnosti zatraži od državnih organa Republike Srbije da postupe na način utvrđen ovom inicijativom, i to:

- priznavanje da je nad bošnjačkim narodom u Srebrenici počinjen genocid, kako je to utvrđeno pravosnažnim presudama relevantnih međunarodnih sudova;
- da se negiranje genocida nad bošnjačkim narodom u Srebrenici utvrdi kao krivično djelo za koje se može izreći zatvorska kazna od najmanje 5 godina;
- da se veličanje i javno promovisanje osuđenih ratnih zločinaca utvrdi kao krivično djelo za koje se može izreći zatvorska kazna u trajanju od najmanje 3 godine;
- da se u Republici Srbiji 11. juli proglasi za Dan sjećanja na genocid u Srebrenici

Objašnjenje pojedinačnih rješenja propisanih ovom odlukom

Član 1: Skupština grada traži od Narodne skupštine Republike Srbije, Vlade Republike Srbije i drugih državnih organa da se prizna genocid u Srebrenici, da se 11. jula proglasi za Dan sjećanja, da se negiranje genocida u Srebrenici utvrdi kao krivično djelo za koje se može izreći zatvorska kazna od najmanje 5 godina kao i da se veličanje i javno promovisanje osuđenih ratnih zločinaca utvrdi kao krivično djelo za koje se može izreći zatvorska kazna u trajanju od najmanje 3 godine .

Član 2: Propisana je obaveza dostavljanja ove Odluke Narodnoj skupštini Republike Srbije i Vladi Republike Srbije.

Član 3: Propisana je obaveza objavljivanja u „Službenom listu grada Novog Pazara“.

Finansijska sredstva za sprovođenje ove odluke nisu potrebna.